



水經第五

漢 桑 欽 撰

後魏 酈 道 元 注

明 吳 瑄 校

河水五 漯水

河水又東過平陰縣北湛水從北來注之河水又東
逕河陽縣故城南

春秋經書天王狩于河陽壬申公朝于王所晉侯
執衛侯而歸于京師春秋左傳僖公二十八年冬
會于温執衛侯是會也晉侯召襄王以諸侯見且

使王狩仲尼曰以臣召君不可以訓故書曰天王狩于河陽言非其狩地服虔賈逵曰河陽温也班固漢書地理志司馬彪表崧郡國志晉太康地道記十三州志河陽別縣非温邑也漢高帝六年封陳洧爲侯國王莽之河亭也十三州志曰治河上河孟津河也郭緣生述征記曰踐土今治坂城是名異春秋焉非今河北見者河陽城故縣也在治坂西北蓋晉之温地故羣儒有温之論矣魏土地記曰治坂城舊名漢祖渡城嶮固南臨孟津河洛陽西北四十二里故鄧鄉矣

河水又逕臨平亭北

帝王世紀曰光武葬臨平亭南西望平陰者也

河水又東逕洛陽縣北

河之南岸有二碑北面題云洛陽北界水二渚分爲之也上舊有河平侯祠祠前有碑今不知所在郭頒世語曰晉文王之世大魚見孟津長數百步高五丈頭在南岸尾在中渚河平侯祠即斯祠也河水又東逕平縣故城北

漢武帝元朔三年封濟北眞王子劉遂爲侯國王莽之所謂治平矣俗謂之小平也有高祖講武塲

河北側岸有二城相對置北中郎府徙諸從隸府
戶并羽林虎賁領隊防之河水南對首陽山春秋
所謂首戴也夷齊之歌所矣曰登彼西山上有夷
齊之廟前有二碑並是後漢河南尹廣陵陳導洛
陽令徐循與處士平蘇騰南陽何進等立事見其
碑又有周公廟魏氏起玄武觀於芒垂張景陽玄
武觀賦所謂高樓特起竦峙岩堯直亭以孤立延
千里之清飈也朝廷有置冰室於斯阜室內有冰
井春秋左傳曰日在北陸而藏冰常以十二月採
冰於河津之隘峽石之阿北陰之中即邠詩二之

日鑿冰冲冲矣而內於井室所謂納於凌陰者也
河南有鉤陳壘世傳武王伐紂八百諸侯所會處
尚書所謂不期同時也紫微有鉤陳之宿主鬪訟
兵陣故遁甲攻取之法以所攻神與勾陳并氣下
制所臨之辰則袂禽敵是以壘資其名矣河水至
斯有盟津之目論衡曰武王伐紂升舟陽侯波起
疾風疾流武王操黃鉞而麾之風波畢除中流白
魚入於舟燿以告天與八百諸侯咸同此盟尚書
所謂不謀同辭也故曰孟津亦曰盟津尚書所謂
東至于孟津者也又曰富平津晉陽秋曰杜預造

橋於富平津所謂造舟爲梁也又謂之曰陶河魏尚書僕射杜畿以帝將許試樓船覆於陶河謂此也昔禹治洪水觀於河見白面長人魚身出曰吾河精也授禹河圖而還於淵及子朝篡位與敬王戰乃取周之寶玉沈河以祈福後二日津人得之於河上將賣之則變而爲石及敬王位定得玉者獻之復爲玉也

河水又東泚水入焉

山海經曰和山上無草木而多瑤碧實惟河之九都是山也五典九水出焉合而北流注于河其陽

多蒼玉吉神泰逢司之是於萑山之陽出入有光呂氏春秋曰夏后氏孔甲田於東陽萑山遇大風雨迷惑入于民室皇甫謐帝王世紀以爲即東首陽山也蓋是山之殊目矣今於首陽東山無水以應之當是今古世懸川域改狀矣昔帝堯修壇河洛擇良議沈率舜等升于首山而導河渚有五老遊焉相謂河圖將來告帝以期知我者重瞳也五老乃翻爲流星而升於昴即於此也

又東沛水注焉又東過鞏縣北

河水於此有五社渡爲五社津建武元年朱鮪遣

持節使者賈彊討難將軍蘇茂將三萬人從五社
津渡攻溫馮異遣校尉與寇恂合擊之大敗追至
河上生擒萬餘人投河而死者數千人縣北有山
臨城謂之空原丘其下有穴謂之鞏穴言潛通浦北
達於河直穴有渚謂之鮪渚成公子安大河賦曰
鱸鯉王鮪暮來遊周禮春薦鮪然非時及佗處則
無故河自鮪穴已上又兼鮪稱呂氏春秋稱武王
伐紂至鮪水紂使膠鬲侯即是

洛水從縣西北流注之

洛水於鞏縣而東洛汭北對琅邪渚入于河謂之

洛口矣自縣西來而北流注洛清濁異流皦焉殊
別應瑒虛河賦曰資虛川之遐源出崑崙之神丘
涉津洛之峻泉播九道於中州者也

又東過成臯縣北濟水從北來注之

河水自洛口又東左逕平高縣南又東逕懷縣南
濟水故道之所入與成臯分河水

河水又逕黃馬坂北

謂之黃馬關孫登之去陽駿作書與洛中故人處
也

河水又東逕旋門坂北

今成臯西大坂者也昇陟此坂而東趣成臯也曹
大家東征賦曰望河洛之交流看成臯之旋門者
也

河水東逕成臯大伾山下

爾雅曰山一成謂之伾許慎呂忱等並以爲丘一
成也孔安國以爲再成曰伾亦或以爲地名非也
尚書禹貢曰過洛汭至大伾者也鄭康成曰地喉
也流出伾際矣然則大伾在河內修武武德之界
濟沅之水與滎播澤出入自此然則大伾即是山
矣伾北即經所謂濟水從北來注之者也今沛水

自温縣入河不於此也所入者奉濟水耳即溝沅
之故瀆矣成臯縣之故伾上縈帶伾阜絕岸峻周
高四十許丈城張翕嶮崎而不平春秋傳曰制巖
邑也虢叔死焉即東虢也魯襄公二年七月晉成
公與諸侯會于咸遂城虎牢以逼鄭求平也蓋脩
故耳穆天子傳曰天子射鳥獵獸於鄭圃命虞人
掠林有虎在乎葭中天子將至七萃之士高奔戎
生擒虎而獻之天子命之爲狎畜之東虞是曰虎
牢矣然則虎牢之名自此始也秦以爲關漢乃縣
之城西北隅有小城周三里北面列觀臨河若若

孤上景明中言之壽春路直茲邑昇眺清遠勢盡
川陸羈途遊至有傷深情

河水南對玉門

昔漢祖與滕公潛出濟於是處也門東對臨河側
岸有土穴魏攻此同州刺史毛德祖於虎牢戰經
二百日不尅城唯一井井深四十丈山勢峻峭不
容防捍潛作地道取井余頃因公至彼故往尋之
其穴處猶存

河水又東合汜水

水南出浮戲山世謂之曰方山也北流車關水出

于嵩渚之山也泉發於層阜之上二源兩枝分流
瀉注世謂之石泉水也東流爲索水西注爲車關
西北流楊蘭水注之水出非山西北流注爲車關
水又西北蒲水入焉水自東浦西流與車關水合
而亂流注于汜汜水又北右合石城水水出石城
山其山複澗重嶺欹疊若城山頂泉流瀑布懸瀉
下有濫泉東流洩注邊有數十石畦畦有聲野蔬
巖側石窟數口隱跡存焉而不知誰所經始也又
東北流注入于汜水汜水下北合鄆水水西出婁
山至冬則煖故世謂之溫泉東北流逕田鄆谷謂

之田豐溪水東流注于汜水汜水又北逕虎牢城東溪破司馬欣曹咎於是水之上汜水又北流注于河征難賦所謂步汜口之芳草弔周襄之鄙館者也余按儒之論周襄所居在潁川襄城縣是乃城名非爲水目原夫致謬之由俱以汜鄭爲名故也是爲爽矣又按郭緣生述征記劉澄之永初記並言高祖即帝位於是水陽今不復知舊壇所在盧諶崔雲亦言是矣余按高皇帝受天命于定陶汜水又不在此也於是求壇故爲髣髴矣
河水又東逕板城北

有津謂之板城渚口

河水又東逕五龍塢北

臨長河塢有五龍祠應劭云崑崙山廟在河東滎陽縣疑即此祠所未詳

又東過滎陽縣浪蕩渠出焉

大禹塞滎澤開之以通淮泗即經所謂浪蕩渠也漢平帝之世河汴決壞未及得修汴渠東侵日月彌廣水門故處皆在水中漢明帝永平十二年議治汴渠上乃引樂浪人王景問理水形便景陳利害應對敏捷帝甚善之乃賜山海經河渠書禹貢圖及

以錢帛後作堤發卒數十萬詔景與將作謁者王
昊共防築堤修塌起自滎陽東至千乘海口千有
餘里景乃商度地勢鑿山開澗防遏衝要䟽決壅
積十里一水門更相澗注無復潰漏之患明年渠
成帝親巡行詔濱河郡國置河堤員吏如西京舊
制景由是顯名王昊諸從事者皆增秩一等順帝
陽嘉中又自汴口以東緣積石爲堰河通淮古口
咸曰金堤靈帝建寧中又增修石門以遏淮口水
盛則通注津耗則輟流

河水又東北逕卷之扈亭北

春秋左傳曰文公七年晉趙盾與諸侯盟于扈竹
書紀年晉出公二十二年河絕於扈即於是也

河水又東逕八激堤北

漢安帝永初七年令謁者太山于岑於石門東積
石八所皆如小山以捍衝波謂之八激堤

河水又東逕卷縣北

晉楚之戰晉軍爭濟舟中之指可掬楚莊祀河告
成而還即是處也

河水又東北逕赤岸固北而東北注之又東北過武
德縣東沁水從之

河水自武德縣漢獻帝延康元年封曹叡爲國即魏明帝也

東至酸棗縣西濮水東出焉

漢興三十有九年孝文時河決酸棗東潰金堤大發卒塞之故班固云文堙棗野武作瓠歌謂斷此口也今無水

河水又東北通謂之延津

石勒之襲劉曜途出於此以河水泮爲神靈之助號是處爲靈昌津昔澹臺子羽齋千金之璧渡河陽侯波起兩蛟挾舟子羽曰吾可以義求不可以

威却操劍斬蛟蛟死波休乃投璧於河三投而輒躍出乃毀壁而去示無恠意趙建武中造浮橋於津上採石爲中濟石無大小下輒流去用功百萬經年不就石虎親閱作工沈璧于河明日璧流渚上波蕩上岸遂斬匠而還

河水又逕東燕縣故城北則有濟水自北來注之

河水於是有棘津之名亦謂之濟津故南津也春秋僖公二十一年晉將伐曹曹在縣東假道于衛衛人不許還自南河即此濟也河水於是亦有棘津之名晉伐陸渾亦於此渡宋元嘉中遣輔國將

卷之五
軍蕭斌率寧朔將軍王玄謨北入宣威將軍桓護
之以水軍守石濟即此處也

河水又東淇水入焉又東逕遮害亭南

漢書溝洫志曰在淇水口東十八里有金隄隄高一丈自淇口東地稍下隄稍高至遮害亭四五丈又有宿胥口舊河水北入也

河水又東右逕滑臺城

有三重中小城謂之滑臺城舊傳滑臺人自修築此城因以名焉城即故鄭廩延邑也下有延津春秋傳曰孔悝爲蒯瞶所逐載伯姬于平陽行于延

津是也廩延南故城即衛之平陽亭也今時人謂此津爲延壽津宋元嘉中右軍到彥之留建威將軍朱脩之守此城魏軍南伐脩之執節不下其母悲憂一旦乳汁驚出母乃號踴告家人曰我年老非有乳時今忽如此吾兒必沒矣脩之絕拔果以其日陷沒城故東郡治續漢書曰延熹九年濟陰東郡濟北平原河水清襄楷上疏曰春秋注記未有河清而今有之易乾鑿度曰上天將降嘉應河水先清京房易傳曰河水清天下平天垂翼地吐妖民厲疾三者並作而有河清春秋麟不當見而

見孔子書以爲異河者諸侯之相清者陽明之徵
豈獨諸侯有窺京師也明年宮車宴駕徵解瀆侯
爲漢嗣是爲靈帝建寧四年二月河水又清也
又東北過黎陽縣南

黎侯國也詩式微黎侯寓于衛是也晉灼曰黎山
在其南河水逕其東其山上碑云縣取山之名取
水之陽以爲名也王莽之魏丞也今黎山之東北
故城蓋黎陽縣之故城也山在城西城憑山爲基
東岨爲河故劉楨黎陽山賦曰南蔭黃河左覆金
城青壇承祀高碑頌靈昔慕容玄明自鄴率衆南

徙滑臺既無舟楫將保黎陽昏而流澌冰合於夜
中濟訖旦而冰泮燕民謂是處爲天橋津東岸有
故城嶮帶長河戴延之謂之違明壘周二十里言
逮明石勒十八騎中城因名焉郭緣生曰城表紹
時築皆非也余按竹書紀年梁惠成王十三年鄭
釐侯使許息來致地平丘戶牖首垣諸邑及鄭馳
地我取枳道與鄭鹿鄭鹿即是城也今城內有故
臺尚謂之鹿鳴臺又謂之鹿鳴城王玄謨自滑臺
走鹿鳴者也濟取名焉故亦曰鹿鳴津又曰白馬
濟津之東南有白馬城衛文公東徙渡河都之故

濟取名焉表紹遣顏良攻東郡太守劉延於白馬
關羽爲曹公斬良以報効即此處是也白馬有韋
鄉韋城故津亦有韋津之稱史記所謂脩武下武
渡韋津者也河水舊於白馬縣南洑通濮濟黃溝
故蘇代說燕曰決白馬之口魏無黃濟陽竹書紀
年梁惠成王十二年楚師山河水以水長垣之外
者也金堤既建故渠水斷尚謂之白馬瀆故瀆東
逕鹿鳴城南又東北逕白馬縣之涼城北耆舊傳
云耆舊東郡白馬縣之神馬亭實中層峙南北二
百步東西五十許步狀丘斬城也自外耕耘墾斫

削落平盡正南有陟躔陞上方軌是由西南側城
有神馬寺樹木脩整西去白馬津可二十許里東
南距白馬縣故城可五十里疑即開山圖之所謂
白馬山也山上常有白馬羣行悲鳴則河決馳走
則山崩注云山在鄭故此鄭也所未詳劉澄之云
有白馬塞孟達登之長歎可謂於川土踈妄矣亭
上舊曰置源城縣治此白馬瀆又東南逕濮陽縣
散入濮水所在決會更相通注以成往復也

河水自津東北逕涼城縣

河北有般祠孟氏記云祠河中積石爲基河水漲

盛恒與水齊戴氏西征記曰今見祠在東岸臨河累石爲壁其屋宇容身而已殊似無靈不如孟氏所記將恐言之過也

河水又東北逕伍子胥廟南

祠在北岸頓丘郡界臨側長河廟前有碑魏青龍三年立

河水又東北爲長壽津

述征記曰涼城到長壽津六十里河之故瀆出焉漢書溝洫志曰河之爲中國害尤甚故導河自積石歷龍門二渠以引河一則漯川今則所流也一

則北瀆王莽時空故世俗名是瀆爲王莽河也

故瀆東北逕戚城西

春秋哀公二年晉趙鞅率師納衛太子蒯聩于戚宵迷陽虎曰右河而南必至焉今須立衛國縣西戚亭是也爲衛之河上邑漢高帝十二年封將軍李必爲侯國矣

故瀆又逕繁陽縣故城東

史記趙將廉頗伐魏取繁陽者也

北逕陰安縣故城西

漢武帝元朔五年封魏不疑爲侯國

故瀆又東北逕昌樂縣故城東

地理志東郡之屬縣也漢宣帝封王稚君爲侯國故瀆又東北逕平邑郭西

竹書紀年晉烈公四年趙城平邑五年田公子居思伐趙鄙圍平邑十年齊田汾及邯鄲韓舉戰于平邑邯鄲之帥敗遂獲韓舉取平邑新城

又東北逕元城縣故城西北而至沙丘堰

史記曰魏武侯公子元食邑於此故縣氏焉郭東有五鹿墟墟之在左右多陷城公羊曰襲邑也說曰襲陷矣郡國志曰五鹿墟故沙鹿有沙亭周穆王

喪盛姬東征舍於五鹿其女叔姪屈此思哭是曰女姪之丘爲沙鹿之異名也春秋左傳僖公十四年沙鹿崩晉史卜之曰陰爲陽雄土火相乘故有沙鹿崩後六百四十五年宜有聖女與其齊田乎後王翁孺自齊徙元城正直其地日月當之王氏爲舜後土也漢火也王禁生政君其母夢見月入懷年十八詔入太子宫生成帝爲元后漢祚道沿四世稱制故曰火土相乘而爲雄也及崩大夫楊雄作誅曰太陰之精沙鹿之靈作合於漢配元生成者也獻帝建安中袁紹與曹操相禦於官渡紹

通大司農鄭玄載病隨軍屆此而卒郡守已下受業者衰經赴者千餘人玄注五經讖緯候歷天文經通於世故范曄贊曰孔書遂明漢章中輒矣縣北有沙丘堰者不遵其道曰降亦曰潰堰障水也至于丈陸北播于九河

風俗通曰河播也播爲九河自此始也禹貢兗州九河既道矣謂徒駭太史馬頰覆釜胡蘇簡潔勾盤鬲津也同爲逆河鄭玄曰下尾合曰逆河言相承受矣蓋所潤下之勢以通河海及齊桓霸世塞廣田居同爲一河故自堰以北館陶嬰陶貝丘南般

信都後改長

廣川信都東光河間樂成以東城地並存川瀆多亡漢世河決金堤南北離其害議者常欲求九河故迹而川之未知其所是以班固云自茲距漢北三入枝者也

河之故瀆自沙丘堰南分屯氏河出焉河水故瀆東北逕發于縣北城西又屈逕其北

王莽之所謂戢楯矣漢武帝以大將軍衛青破左賢王功封其子登爲侯

大河故瀆又東逕貝丘縣故城南

應劭曰左氏齊襄公田于貝丘是也余按京相璠

杜預並言在博昌即司馬彪郡國志所謂貝中聚者也應注於此事近違矣

大河故瀆又東逕甘陵縣故城南

地理志之所謂厓也王莽改曰厓治者也漢安帝父孝德皇以太子被廢爲王薨於此乃葬其地尊陵曰甘陵桓帝建和元年改曰甘陵縣亦取名焉是周之甘泉市地也陵在瀆北丘墳高巨雖中經發壞猶若層陵矣世謂之唐侯家城曰邑城皆非也昔南陽文叔良以建安中爲甘陵丞夜宿水側趙人蘭襄夢求改葬叔良明循水求棺果於水側

得棺半許落水叔良顧親舊曰若聞人傳此吾必以爲不然遂爲移殯醜而去之大河故瀆又東逕艾亭城南又東北逕平晉城南金城中有浮圖五層上有金露盤題云趙建武八年比釋道龍和上竺浮圖澄樹德勸化與立神廟浮圖以壞露盤尚存煒煒有光明大河故瀆又東北逕靈縣故城南王莽之播亭也河瀆於縣別出爲鳴犢河河水故瀆又東逕郟縣故城東呂后四年以父嬰功封子佗龍爲侯國王莽更名之曰善陸

大河故瀆又東逕平原縣故城西而北絕屯氏三瀆

北逕繹幕縣故城東北西流逕平原鬲縣故城西
地理志曰鬲津也王莽名之曰河平亭故有窮后
國也應劭曰鬲偃姓名繇後光武建武十三年封
建議將軍朱祐爲侯國

大河故瀆又北逕脩縣故城東又北逕安陵縣西
本脩之安陵鄉也地理志風俗記曰脩縣東四十
里有安陵縣故縣也又東北至東光縣故城西而
北與漳水合一水分

大河故瀆北出爲屯氏河逕館陶縣東東北出
漢書溝洫志曰自塞宣防河復北決於館陶縣分

爲屯氏河廣深與大河河等成帝之世河決館陶
及東郡金堤上使河堤謁者王延世塞之二十日
堤成詔以建始五年爲河平元年以延世爲光祿
大夫是水亦斷屯氏故瀆水之又東北屯氏別河
出焉屯氏別河故瀆又東北逕信城縣張甲出焉
地理志曰張甲河及瀆首受屯氏別河於信城縣
者也張甲河及瀆北絕河於廣宗縣清分爲二瀆
左瀆逕廣宗縣故城西又北逕建始縣故城東田
融云趙武帝二十二年立建興治廣宗置建始興
德五縣隸焉

絳瀆今交
河有絳水焉
之此瀆下流

左瀆又北逕經城東繚城西又逕南宮縣西北注絳
瀆右瀆又東北逕廣宗縣故城南又東北逕界城亭
北又東北逕長樂郡武彊縣故城東

長樂故信都也晉大康五年改從今名

又東北逕廣川縣與水故道合又東北逕廣川縣故
城西又東逕棘津亭南

徐廣曰棘津在廣川司馬彪曰縣北有棘津城呂
尚賣食之困疑在此也劉澄之云譙郡鄆縣東北
有棘津亭故邑也呂尚所困處也余案春秋左傳
伐巢克棘入州來無津字杜預春秋釋地又言棘

亭在鄆縣東北亦不云有津字矣而竟不知澄之
於何而得是說然天下以棘爲名者多未可咸謂
之棘津也又春秋昭公十四年晉侯使荀吳帥師
涉自棘津用牲于洛遂滅陸渾杜預釋地闕而不
書服虔曰棘津猶孟津也徐廣晉紀又言石勒自
葛陂寇河北襲汲入向水於方頭濟自棘棘津在
東郡河內之間田融以爲即石濟南津也雖千古
茫昧理世玄遠遺文逸句容或可尋公途隱顯方
土可驗司馬遷云呂望東海上人也老而無遇以
釣于周文王又呂望行年五十賣食棘津七十則

屠牛朝歌行年九十身為帝師皇甫士安云欲隱
東海之濱聞文王善養老故入釣于周今汲水城
亦言有呂望隱居處起自東海迄于鄆雍緣其逕
趣趙魏為密厝之譙宋事為疏矣

張甲故瀆又東北至脩縣東會清河

十三州志曰張甲河東北至脩縣入清漳者也

屯氏別河東枝津出焉東逕信成城南又東逕清陽
縣故城南清河郡北

魏自清陽徙置也

又東北逕陵鄉南又東北逕東武城縣故城南又東

北逕東陽縣故城南

地理志曰王莽更之曰胥陵矣俗人謂之高黎郭
非也應劭曰東武城東北三十里有陽鄉故縣也
又東散絕無復津逕

屯氏別瀆又東北逕清河郡南又東北逕清河故城
西

漢高六年封王及為侯國地理風俗志曰甘陵郡
東南十七年有河清故城者世謂之鵲城也又東
北經繹幕縣南分為二瀆

屯氏別河北瀆東逕繹幕縣故城南東邑大河故瀆

又東北逕平原縣枝津北出至安陵縣遂絕

屯氏別河北瀆又東北逕重平縣故城南

應劭曰重合縣西南八十里有重平鄉故縣也又

東北逕重合縣故城南又東北逕定縣故城南漢

武帝元朔四年封齊孝王子劉成爲侯國地理風

俗記曰饒安縣東南三十里有定鄉城故縣也

屯氏別河北瀆又東入陽信縣今無水又東爲咸河

東北流逕陽信縣故城北

地理志渤海之屬縣也東注于海

屯氏別河南瀆自平原東絕大河故瀆又逕平原縣

故城北東北枝津又出東北至安德縣界東會商河

屯氏別河

南瀆又東北於平原界又有枝渠右出至安德縣遂

絕

屯氏別河南瀆自平原城北首受大河故瀆東出亦

通謂之篤馬河

即地理志所謂平原縣有篤馬河東北入海五百

六十里者也

東北逕安德縣故城西又東北逕臨齊城南始

東齊未賓大魏築城以臨之故城得其名也

水經 卷之五
又屈逕其城東故瀆廣四十步又東北逕重丘縣故城西

春秋襄公二十五年秋同盟重丘伐齊故也應劭曰安德縣北五十里有重丘鄉故縣也

又東北逕西平昌縣故城北

北海有平昌縣故加西漢宣帝元康元年封王長君爲侯國故渠川派東入般縣爲般河蓋亦九河之一道也漢書稱公孫瓚破黃巾于般河即此瀆也又東爲白鹿淵水南北三百步東西千餘步深三丈餘其水冬清而夏濁渟而不流若夏水洪泛

水深五丈方乃通注般瀆

又逕般縣故城北

王莽更之曰分明也

東逕樂陵縣故城北

地理志曰故都尉治伏琛晏謨言平原邑今分爲郡

又東北逕陽信縣故城南東北入海

屯氏河故瀆自別河東逕甘陵之信鄉縣故城南

地理志曰順帝更名安平應劭曰甘陵西北十七里有信鄉故縣也

屯氏故瀆又東逕甘陵縣故城北逕靈縣北又東北逕鄆縣與鳴犢河故瀆合上承大河故瀆於靈縣南地理志曰河水自靈縣別出爲鳴犢河者也

東北逕靈縣東入鄆縣而北合屯氏瀆

屯氏瀆兼鳴犢之稱也又東逕鄆縣城北東北合大河故瀆謂之口十三州志曰鳴犢河東北至修入屯氏考瀆則不至也

又東北右過衛國縣南又東北過濮陽縣北瓠子河出焉河水東逕鐵丘南

春秋左氏傳哀公二年鄭罕達帥師郵無恤御簡

子衛太子爲右登鐵丘望見鄭師衛太子自投車下即此處也京相璠曰鐵丘名也杜預曰在戚南河之北岸有目城城戚邑也東城有子路冢河北有竿城郡國志曰衛縣有竿城者也河南有龍淵宮武帝元光中河決濮陽汜郡十六發卒十萬人塞決河起龍淵宮蓋武帝起宮於決河之傍龍淵之側故曰龍淵宮也

河水東北流而逕濮陽縣北爲濮陽津

故城在南與衛縣分水城北十里有瓠河口有金隄宣房堰粵在漢世河決金隄涿郡王遵自益州

刺史遷東郡太守河水盛溢泛浸瓠子金隄決壞
遵躬率民吏投沈白馬祈水神河伯親執圭璧請
身填堤廬居其上吏民皆走遵立不動而水波齊
足而止公私壯其勇節

河水又東北逕衛國縣南東爲郭口津河水又東逕

鄆城縣北

一作國名

故城在河南一十八里王莽之鄆良也沈州舊治
魏武創業始自於此河上之邑最爲峻固晉八王
故事曰東海王越治鄆城城無故自壞七十餘丈
越惡之移治濮陽城南有魏使持節征西將軍太

尉方城侯鄧艾廟廟南有艾碑秦建元十二年廣
武將軍沈州刺史關內侯安定彭超立河之南岸
有新城宋寧朔將軍王玄謨前鋒入河所築也北
岸有新臺鴻基層廣高數丈衛宣公所築新臺矣
詩齊姜所賦也爲廬關津臺東有小城崎嶇頽側
臺枕河俗謂之底閣城疑故關津都尉治也所未
詳矣

河水又東北逕范縣之秦亭西

春秋經書築臺于秦者也

河水又東北逕委粟津

大河之北即東武陽縣也

左會浮水故瀆

故瀆上承大河於頓丘縣而北出東逕繁陽故城南故應劭曰縣在繁水之陽張晏曰縣有繁淵春秋襄公二十年經書公與晉侯齊侯盟于澶淵杜預曰在頓丘縣南今名繁淵澶淵即繁淵也亦謂之浮水焉昔魏徙大梁趙以中牟易魏故志曰趙南至浮水繁陽即是瀆也

故瀆東絕大河故瀆東逕五鹿之野

晉文公受塊於野人即此處矣京相璠曰今衛國

縣西北三十里有五鹿地今屬頓丘縣

浮水故瀆又東南逕國邑

城北故衛公國也漢光武以封周後也

又東逕衛國縣故城南古斟觀

應劭曰夏有觀扈即此城也竹書紀年梁惠成王二年齊田壽率師伐趙圍觀觀降

浮水故瀆又東逕河牧城而東北出

郡國志曰衛國姚姓有河牧城

又東北入東武陽縣東入河又有灑水出焉

戴延之謂之武陽也地理志曰灑水出東郡武陽

灑水

縣今漯水上承河水於武陽縣東南西北逕武陽
新城東曹操爲東郡所治也引水自東門石竇北
注于堂池池南故基尚存中城內又立一石甚大
城西門名水井門門內曲中水井猶存門外有故
臺號武陽臺匝臺亦有隅雉遺迹

河水又東逕武陽縣東范縣西而東北流也又東北
過東阿縣北河水於范縣東北流爲倉亭津

述征記曰倉亭津在范縣界去東阿六十里魏土
地記曰津在武陽縣東北七十里津河濟名也

河水又歷柯澤

春秋左傳襄公十四年衛孫文子敗公徒於柯澤
者也

逕東阿縣故城西而東北出流注

河水枝津東出謂之鄧里渠也

又東北過荏平縣西河自鄧里渠東北逕昌鄉亭北
逕碣磔城西

述征記曰碣磔津名也自黃河泛舟而渡者皆爲
津也其城臨水西南崩于河宋元嘉二十七年以
王玄謨爲寧朔將軍前鋒入河平碣磔守之都督
劉義恭以沙城不守召玄謨令毀城而還後登城

之魏立濟州治此也河水衝其西南隅又崩于河
即故在平縣也應劭曰在山名也縣在山之平陸
故曰在平也王莽之功崇矣經曰大河在其西鄧
里渠歷其東即斯邑也昔石勒之隸師惟屯耕於
在平聞鼓角鞞鐸之聲於是縣也而與棧城分河
河水又與鄧里渠水上承大河於東阿縣西東逕東
阿縣故城北

故衛邑也應仲瑗曰有西故稱東魏封曹雄爲侯
國大城北門內西側阜上有大井其巨若輪深六
七丈歲嘗煮膠以貢天府本草所謂阿膠也故世

俗有阿井之名縣出佳繒繅故史記云秦昭王服
太阿之劍阿縞之衣也

又東北逕臨邑縣與將渠合又北逕在平縣東臨邑縣
故城西北流入於河河水又東北流逕四瀆津

津西側岸臨河有四瀆祠東對四瀆口河水東分
濟亦曰沛水受河也然滎口水右斷門不通始自
是出東北流逕九里與清水合放沛瀆也自河入
濟自沛入淮自淮達江水徑周通故有四瀆之名
也昔趙殺鳴犢仲尼臨河而歎自是而返曰丘之
不濟命也夫琴操以爲孔子臨狄水而歌云狄水

行兮風揚波船楫顛倒更相加余案臨濟故狄也
是濟所逕也得其通稱河水又逕楊墟縣之故城
東俗猶謂是城曰陽城矣河水又逕荏平城東城
內有故臺世謂之時平城非也蓋荏時音相近耳
疑縣徙也

又東北過高唐縣界

河水於縣漯水注之水自城東北逕東武陽縣故
城南應劭曰縣在武水之陽王莽之武昌也然則
漯水亦或武水也臧洪爲東郡太守治此曹操圍
張超於雍丘洪以情義請袁紹救之不許洪與紹

絕紹圍洪城中無食洪呼吏士曰洪於大義不得
不死諸君無事空受此禍衆泣曰何忍捨明府也
男女八千餘人相枕而死洪不屈紹殺洪邑人陳
容爲丞謂曰寧與臧洪同日死不與將軍同日生
紹又殺之士爲傷歎今城四周紹圍郭尚存水匝
隍漸於城東北合爲一瀆東北出郭逕陽平縣之
岡城西郡國志曰陽平縣有岡成亭逕陽平縣故
城東漢昭帝元平元年封丞相蔡義爲侯國漯水
又北絕莘道城之西北有莘亭春秋桓公十年衛
宣公使伋使諸齊令盜待於莘伋壽繼殞於此亭

京相璠曰今平陽陽平縣北一十里有故莘亭道
阨限蹊要自衛適齊之道也望新臺於河上感二
子於宿齡詩人乘舟誠可悲矣今縣東有二子廟
猶謂之孝祠矣漯水又東北逕樂平縣故城東縣
故清也漢高帝八年封空中於清宣帝封許廣少
弟翁孫于樂平並爲侯國王莽之清治矣漢章帝
建始中更從今名也漯水又北逕聊城縣故城西
城內有金城周匝有水南門有馳道絕水南出自
外泛舟而行矣東門側有層臺秀出魯仲連所謂
還高唐之兵郤聊城之衆者也

漯水又東北逕清河縣故城北

地理風俗記曰甘陵故清河清河在南一十七里
今於甘陵縣故城東南無城以擬之直東二十里
有艾亭城東南四十里有此城疑即清河城也後
蠻居之故世稱蠻城也

漯水又東北逕文鄉城東南又東北逕博平縣
故城內有層臺秀上王莽改之曰加睦也

右與黃溝同注川澤

黃溝承聊城郭水水泛則津注水耗則輟流自城
東北出逕清河城南又東北逕攝城北春秋所謂

聊攝以東也俗稱郭城非也城東西三里南北二里東西隅有金城城卑下墟郭尚存左右多墳壠京相璠曰聊城縣東北三十里有故攝城今此城西去聊城二十五六里許即攝城者也又東逕文鄉城又東南逕王城北

魏太常七年安平王鎮平原所築世謂之王城太和二十三年罷鎮立平原郡治此城也

黃溝又東北逕左與漯水隱覆勢鎮河陸東出於高唐縣大河右迤東注漯水矣

桑欽地理志曰漯水出高唐余按竹書穆天子傳

宋刊本自此起前闕

稱丁卯天子自五鹿東征釣於漯水以祭淑人是曰祭丘巳巳天子東征食馬於漯水之上尋其泐歷逕趣不得近出高唐也桑氏所言蓋津流出次于所間也俗以是水上承于河亦謂之源河矣

漯水又東北逕援縣故城西

王莽之東順亭也杜預釋地曰濟南祝阿縣西北有援城

漯水又逕高唐縣故城東

昔齊威王使盼子守高唐趙人不敢漁於河即魯仲連子謂田巴曰今楚軍南陽趙伐高唐者也春

秋左傳哀公十年趙鞅帥師伐齊取黎及轅毀高唐之郭杜預曰轅即援也祝阿縣西北有高唐城
漂水又東北逕漂陰縣故城北

縣故黎邑也漢武帝元光三年封匈奴降王王莽
更名翼成歷北漂陰城南伏琛謂之漂陽城南有
魏沈州刺史劉侏碑地理風俗記曰平原漂陰縣
今巨漂亭是也

漂水又東北逕著縣故城南又東北逕崔氏城北
春秋左傳襄公二十七年崔成請老崔氏者也杜
預釋地曰濟南東朝陽縣西北有崔氏城

漂水東南逕東朝陽縣故城南

漢高帝六年封都尉華寄為侯國地理風俗記曰
南陽有朝陽縣故加東地理志曰王莽之修治也
漂水又東逕漢徵君伏生墓南

碑碣尚存以明經為秦博士秦坑坑儒士伏生隱焉
漢興教于齊魯之間文帝撰五經尚書太傳安車
徵之年老不行乃使掌故歐陽生等受尚書於徵
君號曰伏生者也

漂水又東逕鄒平縣故城北

有鄒侯國舜後姚姓也

又東北逕界東鄒城北

地理志曰千乘郡有東鄒縣

漯水又東北逕建信縣故城北

漢高帝七年封婁敬為侯國應劭曰臨沛縣西北五十里有建信信城都尉治故城者也

漯水又東北逕千乘縣二城間

漢高帝六年以為千乘郡王莽之建信也章帝建初四年為王國和帝永元七年改為樂安郡故齊也伏琛曰千乘城齊城西北一百五十里隔會水即漯水之別名也

又東北為馬常坑

坑東西八十里南北三十里亂河支流而入于海河海之饒茲焉為最地理風俗記曰漯水東北至千乘入海河盛則通津委海水耗則微涓絕流書浮于濟漯亦是水者也

又東北過楊墟縣東南出焉

地理志曰楊墟平原之隸縣也漢景帝四年以封齊悼惠王子將廬為侯國也城在高唐城之西南經次于此是不北也商河受首河亦漯水及澤水所潭水也淵而不流世謂之清水自此雖沙漲填

商水

塞厥迹尚存歷澤而北俗謂之落里坑逕張公城西又北重源潛發世謂之落里坑亦曰小漳河南漳聲相近故字與讀移耳

商河又北逕平原縣東又逕安德縣故城南又東北逕昌平縣故城南又東逕般縣故城南又東逕樂陵縣故城南

漢宣帝地節四年封侍中史子長為侯國

商河又東逕初鄉縣故城南

高后八年封齊悼惠王子劉辟光為侯國也王莽更之曰張鄉也應劭曰般縣東南六十里有初鄉

沙溝水

沙溝水注之

水南出大河之陽泉源之不合河者二百步其水北流注商河

商河又東北流逕馬嶺城西北而流屈而東注南轉逕城東

城在河曲之中東海王越斬汲桑於是城

商河又東北逕富平縣故城北

地理志曰侯國也王莽曰安樂亭應劭曰明帝更名關駟曰厭次縣本富平矣車騎將軍張安世之

水經 卷之五
封邑非也按漢書昭帝元鳳六年封右將軍張安世為富平侯薨子延壽嗣國在陳留別邑魏郡陳留風俗傳曰陳留尉氏縣安陵鄉故富平縣也是乃安世所食矣歲入租千餘萬延壽自以身無功德何堪父居先人大國上書減戶天子以為有讓徙封平原并食一邑戶口如故而稅減半十三州志曰明帝永平五年改曰厭次矣按史記高祖功臣侯者年表高帝六年封元頃為侯國徐廣音義曰漢書作侯爰類是知厭次舊名非始明帝蓋復故耳縣西有東方朔冢側有祠祠有神驗水側有雲

商河分為

城漢武帝元封四年封齊孝王子劉信為侯國也商河又分為二水南水謂之長駝溝

東流傾注為海溝南海側有蒲臺臺高八丈方二百步三齊略記曰鬲城東南有蒲臺秦始皇東遊海上於臺下蟠蒲繫馬至今歲蒲生縈委若有繫狀似水楊可以為箭今東去海三十里

北水世又謂之白薄瀆

東北流注于海水矣

大河又東北逕高唐縣故城西

春秋左傳襄公十九年齊靈公廢太子光而立公

子牙以夙沙衛爲少傅齊侯卒崔杼逆光光立殺公子牙於句瀆之丘衛奔高唐以叛京相璠曰本平原縣也魏之西鄙也大河逕其西而不出其東經言出東誤耳

大河又北逕張公城臨側河湄

魏青州刺史張治此故世謂之張公城水有津焉名之曰張公渡

河水又北逕平原縣故城東

地理風俗記曰原博平也故曰平原矣縣故平原郡治矣漢高帝六年置王莽改曰河平也晉灼曰

齊西有平原河河水北過高唐縣即平原也故經言河水逕高唐縣東非也案地理志曰高唐平原也高唐潔水所出平原則篤馬河導焉明平原非高唐大河不得出其東審矣

大河右溢世謂之甘棗溝

水側多棗故俗取名焉河盛則委泛水耗則輟流故瀆又東北歷長隄逕温陰縣北

東逕著城北東爲陂淀淵潭相接世謂之穢野薄河水又東北逕陽阿縣故城西

漢高帝六年封郎中萬訢爲侯國應劭曰温陰縣

東南五十里有陽阿鄉故縣也

又東北過漯陽縣北河水自平原左逕安德城東而北為鹿角津東北逕般縣樂陵初鄉厭次縣故南厭次河

漢安帝永初二年劇縣畢毫等數百乘船寇平原縣令劉雄門下小吏所輔浮舟追至厭次津與賊合戰並為賊擒求代雄毫縱雄於此津所輔可謂孝盡愛敬義極君臣矣

河水又逕漯陽縣故城北一作右逕王莽之臣武縣也

河水又東北為漯沃津

漯沃縣故城南王莽之延亭者也地理風俗記曰千乘縣西北五十里有大河河北有漯沃城故縣也魏改為後部亭今俗遂名之曰右輔城

河水又東逕千乘城北

伏琛之所謂千乘北城者也

又東北過黎城縣北又東北過甲下邑濟水從西來注之又東北入于海

河水又東分為二水枝津東逕甲下城南東南歷常沈注濟

經言濟水注河水自枝津東北流逕甲下邑北世謂之倉子城非也又東北流入于海淮南子曰九折注爲海而流不絕者崑崙之輸也尚書禹貢曰夾右碣石入于河山海經曰碣石之山繩水出焉東流注于河河之入海舊在碣石今川流所導非禹瀆也周定王五年河徙故瀆故班固曰商竭周移也又以漢武帝元光二年河又徙東郡更注渤海是以漢司空掾王璜言曰往昔天嘗連北風海水溢西南出侵數百里故張君云碣石在海中蓋淪於海水也昔燕齊遼曠分置營州今城屆海濱

海水北侵城垂淪半王璜之言信而有徵碣石入海非無證

水經卷第五

水經第五

水經第六

漢 桑 欽 撰

後魏 酈 道 元 注

明 吳 瑄 校

汾水

澮水

涑水

文水

原公水

洞渦水

晉水

湛水

汾水出太原汾陽縣北管涔山

山海經曰北次二經之首在河之東其東首枕汾其名曰管涔之山其上無草木而下多玉汾水出焉而流注于河十三州志曰出武州之燕京山亦

管涔之異名也其山重阜脩巖有草無木泉源道於南麓之下蓋稚水濛流耳又西南夾岸連山聯峯接勢劉淵族子曜嘗隱居於管涔之山夜中忽有二童子入跪曰管涔王使小臣奉謁趙皇帝獻劔一口置前再拜而去以燭視之劔長二尺光澤非常背有銘曰神劔服御除衆毒曜遂服之劔隨時變爲五色也後曜遂爲胡王矣汾水又南與東西溫谿合水出右近谿聲流翼注水上雜樹交蔭雲垂煙接自是水流潭漲波襄轉泛又南逕一城東憑墉積石側枕汾水俗謂之代城城又南出二

城間其城角倚翼枕汾流世謂之侯莫干城蓋語出戎方傳呼失實也汾水又南逕汾陽縣故城東川土寬平峘山夷水故地理志汾水出汾陽縣北山西南流者也漢高帝十一年封靳彊爲侯國後立屯農積粟在斯謂之羊腸倉山有羊腸坂在晉陽西北石磴縈委若羊腸焉故倉坂取名矣漢永平中治呼沱石曰河按司馬彪後漢郡國志常山南行唐縣有石曰谷蓋谷乘呼沱之水轉山東之費自都盧至羊腸倉將憑汾水以漕太原用實秦晉苦役連年轉運所經凡三百八十九隘或者無

筭拜鄧訓爲謁者監護水功訓隱括知其難立具
言肅宗肅宗從之全活數千人和熹鄧后之立叔
父以爲訓積善所致也羊腸卽此倉也魏土地記
曰秀容胡人徙居之立秀容護軍治東去汾水六
十里南與酸水合水源西出少陽之山東南流注
於汾水汾水又南出山東南流洛陰水注之水出
新興郡西流逕洛陰城北又西逕孟縣故城南春
秋左傳僖公二十八年分祈祁氏七縣爲大夫之邑
以孟丙爲孟大夫水又西逕狼孟縣故城南王莽
之狼調也左右夾澗幽深南面大壑俗謂之狼馬

澗舊斷澗爲城有南北門門闔闔故壁尚在洛陰水
又西南逕陽曲城北魏土地記曰陽曲胡寄居太
原界置陽曲護軍治其水西南流注于汾水汾水
又南逕陽曲城西南注也

東南過晉陽縣東晉水從縣東南流注之

太原郡治晉陽城秦昭襄王三年立尚書所謂旣
修太原者也春秋說題辭曰高平曰太原原端也
平而有度廣延曰大鹵太原也釋名曰地不生物
曰鹵盧穀梁傳曰中國曰太原夷狄曰大鹵尚書
大傳曰東原底平大而高平者謂之太原郡取稱

焉魏土地記曰城東有汾水南流水東有晉使持節都督并州諸軍事鎮北將軍太原成王之碑水上舊有梁清泝殞於梁下豫讓歿於津側亦襄子解衣之所在也汾水西逕晉陽城南舊有介子推祠前有碑廟宇傾頽唯單碑獨存矣今文字剥落無可尋也

又南洞渦水從東來注之

汾水又南逕梗陽縣故城東故榆次之梗陽縣也魏獻子以邑大夫魏戊也京相璠曰梗陽晉邑也今太原晉陽縣南四十里榆次界有梗陽地汾水

又南卽洞渦水會者也

又南過大陵縣東

昔趙武靈王遊大陵夢處女鼓琴而歌想見其人吳廣進孟姚焉卽於此縣也王莽改曰大寧矣汾水於縣左迤爲鄔澤廣雅曰水自汾出爲汾陂其陂東西四里南北一十餘里陂南接鄔地理志曰允澤在北并州藪也呂氏春秋謂之大理又名之曰温洩之澤俗謂之鄔城許慎說文曰馮水出西河中陽縣之西南入河卽此水也馮水又會嬰侯之水山海經稱謁戾之山嬰侯之水出于其陰北

流注于汜水右出汜山其水殊源共合注于嬰侯
之水亂流逕中都縣南俗又謂之中都水侯甲水
注之水發原平縣胡甲山有長坂謂之胡甲嶺卽劉
歆遂初賦所謂越侯甲而長驅者也蔡邕曰侯甲
亦邑名也在祁縣侯甲水又西北歷宜歲郊逕太
谷謂之太谷水出谷西北流逕祁縣故城南自縣
連延西接鄔澤是爲祁藪也卽爾雅所謂昭餘祈
矣賈辛邑也辛貌醜妻不爲言與之如臯射雉雙
中之則笑也王莽之示縣也又西逕京陵縣故城
北王莽更名曰致城矣於春秋爲九原之地也故

國語曰趙文子與叔向遊於九原曰死者若可作
也吾誰與歸叔向曰其陽子乎文子曰夫陽子行
廉直於晉國不免其身智不足稱吾其隨會乎納
諫不忘其師矣故其京尚存漢興增陵於其下故
曰京陵焉甲水又西北逕中都縣故城南臨城際
水湄春秋昭公二十一年晉侯執陳無宇於中都者也
漢文帝爲代王都此武帝元封四年上幸中都宮
殿上見光赦中都死罪以下甲水又西合爲嬰侯
之水逕鄔縣故城南晉大夫司馬彌牟之邑也謂
之鄔水也俗亦曰慮水慮馮聲相近故因變焉又

西北入鄔陂而歸于汾流矣

又南過平陶縣東文水從西來流注之

汾水又南與石桐水合卽綿水也水出界休縣之綿山北流逕石桐寺西卽介子推之祀也昔子推逃晉文公之賞而隱於綿上之山也晉文公求之不得乃封綿爲介子推田曰以志吾過且旌善人因名斯山爲介山故袁崧郡國志曰界休縣有介山有綿上聚子推廟王肅襄服要記曰昔魯哀公祖載其父孔子問曰寧設桂樹乎哀公曰不也桂樹者起於介子推子推晉之人也文公有內難出國

之狄子推隨其行割肉以續軍糧後文公復國忽忘子推子推奉唱而歌文公始悟當受爵祿子推奔介山抱木而燒死國人葬之恐其神魂賈於地故作桂樹焉吾父生於宮殿死於枕席何用桂樹爲余案夫子尚非璵璠送葬安能問桂樹爲禮乎王肅此證近於誣矣石桐水又西流注于汾水又西南逕介休縣故城西王莽更名之曰介美矣城東有徵士郭林宗宋子浚二碑宋沖以有道司徒徵林宗縣也辟司徒舉太尉以疾辭其碑文之云將蹈洪崖之遐迹紹巢由之逸軌翔區外以舒翼

起天路以高峙稟命不融享年四十有三建寧四年正月丁亥卒凡我四方同好之人永懷哀痛乃樹碑表墓昭銘景行云陳留蔡伯喈范陽盧子幹扶風馬日磾等遠來奔喪朋友服心喪暮年者如韓子助宋子浚等二十四人其餘門人著錫衰者千數其碑文故蔡伯喈謂盧子幹馬日磾曰吾爲天下碑文多矣皆有慙容唯郭有道無愧於色矣汾水之右有左部城側臨汾水蓋劉淵爲晉都尉所築也

又南過冠爵津

一作冠

汾津名也在介休縣之西南俗謂之雀鼠谷數十里間道隘水左右悉結偏梁閣道累石就路縈帶巖側或去一丈或高六丈上戴山阜下臨絕澗俗謂之爲暮般橋蓋通古之津隘又亦在今之地嶮也

又南入河東界又南過永安縣西

故彘縣也周厲王流于彘卽此城也王莽更名黃城漢順帝陽嘉二年改曰永安縣霍伯之都也歷唐城東瓚注漢書云堯所都也東去彘十里汾水又東與彘水合水出東北太岳山禹貢所謂岳陽

也卽霍太山矣上有飛廉以善走事紂惡來
力見知周王伐紂兼殺惡來飛廉先爲紂使北方
還無所報乃壇於霍太山而致命焉得石棺銘曰
帝令處父不與殷亂賜汝石棺以葬死遂以葬於
霍太山有岳廟甚靈鳥雀不棲其林猛虎常守
其庭又有靈泉以供祭事鼓動則泉流聲絕則水
竭湘東陰山縣有侯曇山有上靈壇壇前有石井
深數尺居常無水及臨祈禱則甘泉湧出周用則
已亦其比也彘水又西流逕觀阜北故有邑也原
過之從襄子也受竹書於王澤以告襄子襄子齋

三月親自剖竹有朱書曰余霍太山山陽侯天史
也三月丙戌余將使汝反滅智氏女亦立我於百
邑也襄子拜受三神之命遂滅智氏祠三神於百
邑使原過主之世謂其處爲觀阜也彘水又西流
逕永安縣故城南西南流注于汾水汾水又南逕
霍城東故霍國也昔晉獻公滅霍趙夙爲御霍求
公奔齊晉國大旱卜之曰霍太山爲祟使趙夙召
霍君奉祀晉復穰也蓋霍求公之故居也汾水又
逕趙城西南穆王以封造父趙氏自此始也汾水
又南霍水入焉水出霍太山發源成潭漲七十步

而不測其深西南逕趙城南西流注于汾水

又南過楊縣東

間水東出穀遠縣西山西南逕楊縣霍山南又西逕故城北晉大夫僚公去安之邑也應劭曰故楊侯國王莽更名有年亭也其水西流入于汾水汾水逕楊城西不於東矣魏土地記曰平楊郡治楊縣郡西有汾水南流者是也

西南過高粱邑西

黑水出黑山西逕楊城南又西與巢山水會山海經曰牛首之山勞水出焉西流注于潘水疑是水

也潘水卽巢山之水也水源東南出巢山東谷北逕浮山東又西北流與勞水合亂流西北逕高粱城北西流入于汾水又南逕高粱故城西故高粱之墟也春秋僖公二十四年秦穆公納公子重耳於晉害懷公於此竹書紀年晉出公三十年智伯瑤城高粱漢高帝十二年以爲侯國封恭侯酈介於斯邑也

又南過平陽縣東

汾水又南逕白馬城西魏刑白馬而築之故世謂之白馬城今平陽郡治汾水又南逕平陽縣故城

東晉大夫趙鼂之故邑也應劭曰縣在平河之陽
堯舜並都之也竹書紀年晉烈公元年韓武子都
平陽漢昭帝封度遼將軍范明友爲侯國王莽之
番平也晉立平陽郡治此矣水側有堯廟前有碑
魏土地記曰平陽城東十里汾水東原上有小臺
臺上有堯神屋石碑永嘉三年劉淵徙平陽於汾
水得白玉印方四寸高二寸二分龍紐其文曰有
新寶之印王莽所造也淵以爲天授改永鳳二年
爲河瑞元年汾水南與平陽合水出平陽西壺口
山尚書所謂壺口治梁及岐也其水東逕狐谷亭

北春秋時狄侵晉取狐厨者也又東逕平陽城南
東入汾俗以爲晉水非也汾水又南歷襄陵縣故
城西晉大夫邾犇之邑也故其地有犇氏鄉亭矣
縣蓋卽陵以名氏也王莽更名曰幹昌也

又南過臨汾縣東

天井水出東陘山西南北有長嶺嶺上東西有通
道卽鉏蹠也穆天子傳曰乙酉天子西絕鉏蹠西
南至鹽是也其水三泉奇發西北流摠成一川西逕
堯城南又西流入汾

又屈從縣南西流

汾水又經絳縣故城北竹書紀年梁武王二十五年絳中地墉西絕於汾汾水西逕虎祁宮北橫水有故梁截汾水中凡有三十柱柱徑五尺栽與水平蓋晉平公之故梁也物在水故能持久而不敗也又西逕魏正平郡南故東州治大和中皇都徙洛罷州立郡矣又西逕正橋澮水入焉

又西過長修縣南

汾水又西與古水合出臨汾縣故城西黃阜下其大若輪西南流故橫溝出焉東注于汾今無水又西南逕魏正平郡北又西逕荀城東古荀國也汲

郡古文晉武公滅荀以賜大夫原氏也古水又西南入于汾汾水又西南逕長修縣故城南漢高帝十一年以爲侯國封莊恬也有修水出縣南而西南流入汾汾水又西逕清原城北故清陽亭也城北有清原晉侯蒐清原作三軍處也汾水又逕冀亭南昔曰季使過冀野見郤缺耨其妻饁之相敬如賓言之文公文公命之爲卿復與之冀京相璠曰今河東皮氏縣有冀亭古之冀國所都也杜預釋地曰平陽皮氏縣東北有冀亭卽此亭也汾水又西與華水合水出北山華谷西南流逕一故城

西俗謂之梗楊城非也梗楊在榆次在此非案故漢上谷長史侯相碑云侯氏出自倉頡之後踰殷歷周各以氏分或著楚魏或顯齊秦晉卿士薦斯其裔也食于華陽今蒲坂北亭也卽是城也其水西南流注于汾汾水又逕稷山北在水南四十許里山東西二十里南北三十里高十三里西去介山一十五里山上有稷祠山下稷亭春秋宣公十五年秦桓公治兵于稷以略狄土是也

又西過皮氏縣南

汾水西逕鄧丘北故漢氏之方澤也賈逵云漢法

三年祭地汾陰方澤澤中有方丘故謂之方澤丘卽鄧丘也許慎說文稱從邑發聲河東臨汾地名矣在介山北山卽汾山也其山特立周七十里高三十里穎言在皮氏縣東南側可三十里乃非也今準此山可高十餘里山上有神廟廟側有靈泉祈祭之日周而不耗世亦謂之子推祠楊雄河東賦曰靈輿安步周流容與以覽于介山嗟文公而愍推兮勤大禹於龍門晉太康記及地道記與永初記並言子推所逃隱於是山卽實非也余按介推所隱者綿山也文公環而封之爲介推田號其

山爲介山杜預曰在西河介休縣者是也汾水又西逕耿鄉城北故殷都也帝祖乙自相徙此爲河所毀故書叙曰祖乙圮于耿杜預曰平陽皮氏縣東南耿鄉是也盤庚以耿在河北迫近山川乃自耿遷亳後晉獻公滅之以封趙夙後襄子與韓魏分晉韓康子居平陽魏桓子都安邑號爲三晉此其一也漢武帝行幸河東濟汾河作秋風辭於斯水之上汾水又西逕皮氏縣南竹書紀年魏襄王十二年秦公孫爰率師伐我圍皮氏翟章率師救皮氏圍疾西風十三年城皮氏者也漢河東太守

潘係穿渠引汾水以溉皮氏縣故渠尚存今無水又西至汾陰縣北西注于河

水南有長阜背汾帶河阜長四五里廣二里餘高十丈汾水歷其陰西入河漢書謂之汾陰睢應劭曰睢丘類也汾陰男子公孫祥望氣寶物之精上見詳言之於武帝武帝於水獲寶鼎焉遷於甘泉宮改其年曰元鼎卽此處

澮水出河東絳縣東澮交東高山

澮水東出詳高山亦曰河南山又曰澮山西逕翼城南按詩譜言晉穆侯遷都于絳翼孫孝侯改絳

爲翼翼爲晉之舊都也後獻公又北廣其城方二里又命之爲絳故司馬遷史記年表稱獻公九年始成絳都左傳莊公二十六年晉士蔿城絳以深其宮是也其水又西南合黑水嶺水導源東北黑水谷西南流逕翼城北右引北川水出平川南流注之亂流西南入澮水澮水又西南與諸水合謂之澮交竹書紀年曰莊伯十二年翼侯焚曲沃之禾而還作爲文公也又有賀水東出近川西南至澮交入澮又有高泉水出東南近川西北趣澮交注澮又南紫谷水東出白馬山白馬川遁甲關山

圖曰絳山東距白馬山謂是山也西逕榮庭城南而西出紫谷與乾河合卽敎水之枝川也史記白起傳稱起涉河取韓安邑東至乾河是也其水西與田川水合水出東谿西北至澮交入澮又有女家水出于家谷竹書紀年曰莊伯以曲沃叛伐翼公子萬救翼翼若叔軫追之至于家谷有范壁水出於壁下並西北流至翼廣城昔晉軍北入翼廣以築之因卽其姓以名之二水合而爲西北流至澮交入澮澮水又西南與絳水合俗謂之白水也非也水出絳山東至寒泉奮湧揚波北注縣流奔壑

十一許丈青崖若點黛素湍如委練望之極爲奇
觀矣其水西北注流于澮應劭曰絳水出絳縣西
南蓋以故絳爲言也史記稱智伯率韓魏引水灌
晉陽不沒者三版智氏曰吾始不知水可以亡人
國今乃知之汾水可以浸平陽絳水可以浸安邑
時韓居平陽魏居安邑魏栢子肘韓康子韓康子
履魏栢子肘足接於車上而智氏以亡魯定公問
一言可以喪邦有諸孔子以爲幾乎余覩智氏之
談矣汾水灌平陽或亦有之絳水澆安邑未識所
由也

西過其縣南

春秋成公元年晉悼公謀去故絳欲居郇瑕魏獻
子曰土薄水淺不如新田有汾澮以流其惡遂居
新田又謂之絳卽絳陽也蓋在絳澮之陽漢高帝
六年封越騎將軍華無害爲侯國縣南對絳山面
背二水古文瓚語曰晉平公與齊景公乘至于澮
上見乘白驂八駟以來有犬狸身而狐尾隨平公
之車公問師曠對首陽之神有犬狸身狐尾其名
曰者飲酒得福則徼之蓋於是水之上也

又西南過虎祁宮南

宮在新田絳縣故城西四十里晉平公之所構也
時有石言於魏榆晉侯以問師曠曠曰石不能言
或憑焉臣聞之作事不時怨讟動于民則有非言
之物言也今宮室崇侈民力彫盡石言不亦宜乎
叔向以爲子野之言君子矣其宮地背汾面澮西
則兩川之交會也竹書紀年曰晉出公五年澮絕
于梁卽是水也

又西至王橋注于汾水

晉智伯瑤攻趙襄子襄子奔保晉陽原過後至遇
三人於此澤自帶以下不見持竹二節與原過曰

爲我遺無邱原過受之於是澤所謂王澤也

涑水出河東聞喜縣東山黍葭谷

涑水所出俗謂之華谷至周陽與洮水合水源東
出清野山世人以爲清襄山也其水東大嶺下西
流出謂之哈口又西合涑水鄭使子產問晉平公
疾平公曰卜云臺台爲祟史官莫知敢問子產曰
高辛氏有二子長曰閼伯季曰實沈不能相容帝
遷閼伯于商丘遷實沈于大夏臺台實沈之後能
業其官帝用嘉之國汾川由是觀之臺台汾洮之
神也賈逵曰汾洮二水名司馬彪曰洮水出聞喜

縣故王莽以縣爲洮亭也然則涑水殆亦洮水之兼稱乎

又西過周陽邑南

其城南臨涑水北倚山原竹書紀年晉獻公二十五年正月翟人伐晉周有白兔舞于市卽是邑也漢景帝以封田勝爲侯國也涑水西逕董澤陂南卽古池東西四里南北三里春秋文公六年蒐于董澤卽斯澤也涑水又與景水合水出景山北谷山海經曰景山南望鹽販之澤北望少澤其草多諸蕓秦椒其陰多赭其陽多玉郭景純曰鹽販之

澤卽解縣鹽池也按經不言有水今有水焉西北流注于涑水也

又西南過其縣南

涑水又西逕仲邨邨北又西逕桐鄉城北竹書紀年曰翼侯伐曲沃大捷武公請城于翼至洞庭乃返者也漢書曰漢武帝元鼎六年將幸緱氏至左邑桐鄉聞南越破以爲聞喜縣者也涑水又西與沙渠水合水出東南近川西北流注于涑水涑水又西南逕左邑縣故南城故曲沃也晉武公自晉陽徙自秦改爲左邑縣詩所謂從子于鵠者也春

秋傳曰下國有宗廟謂之國在絳曰下國矣卽新城也王莽之洮亭也涑水自城西注水流急濬輕津無緩故詩人以爲激揚之永言不能流移東薪耳水側卽狐突遇申生處也春秋傳曰秋狐突適下國遇太子太子登僕使曰夷吾無禮吾請帝以畀秦對曰神不歆非類君其圖之君曰諾請七日見我於新城西偏及期而往見於此處故傳曰鬼神所憑有時而信矣涑水又西逕王官城北在南原上春秋左傳成公十三年四月晉侯使呂相絕秦曰康猶不悛入我河曲伐我涑川俘我王官故有

河曲之戰是矣今世人猶謂其城曰王城也

又西南過安邑縣西

安邑禹都也禹娶塗山氏女思戀本國築臺以望之今城南門臺基猶存余案禮天子諸侯臺門隅阿相降而已未必一如書傳也故晉邑矣春秋時魏絳自魏徙此昔文侯縣師經之琴於其門以爲言戒也武侯二年又城安邑蓋增廣之秦始皇使左更白起取安邑置河東郡王莽更名洮陽縣曰河東也有項寧都學道昇仙忽復還此河東號曰升仙漢世又有閔仲叔隱遯市邑罕有知者後以

識瞻而去涑水又西南逕監鹽縣故城城南有鹽池水承鹽水出東南薄山西北流逕巫咸山北地理志曰山在安邑縣東海外西經曰巫咸在女丑北右手操青蛇左手操赤蛇在登葆山羣巫所從上下也大荒西經云大荒之中有靈山巫咸卽巫盼巫彭巫姑巫真巫禮巫抵巫謝巫羅十巫從此升降百藥爰在郭景純曰言羣巫上下靈山采藥往來也蓋神巫所遊故山得其名矣谷曰嶺上有巫咸祠其水又逕安邑故城南又西流注于鹽池地理志曰鹽池在安邑西南許慎謂之鹽監長五

十一里廣六里周一百一十四里從鹽古聲呂宿曰沈沙煮海謂之鹽河東鹽池謂之解鹽今池水東西七十里南北十七里紫色澄渟渾而不流出石鹽自然印成朝取夕復終無減損唯水暴雨澍甘潦奔洑則鹽池用耗故公私共竭水徑防其淫濫故謂之鹽水亦爲竭水也故山海經謂之鹽販之澤也澤南面層山天巖雲秀池谷泉深左右壁立間不容軌謂之石門路出其中名之曰徑南通上陽北墜鹽澤池西又有一池謂之女鹽澤東西二十五里南北二十里在猗氏故城南春秋成

公六年晉謀去故絳大夫曰郇瑕地沃饒近鹽服
虔曰土平有漑曰沃鹽鹽也土人鄉俗引水裂沃
麻分灌川野畦水耗竭土自成鹽卽所謂鹽鹺也
而味苦號曰鹽田鹽鹽之名始資是矣本司鹽都
尉治領兵一千餘人守之周穆王漢章帝並幸安
邑而觀鹽池故杜預曰猗氏有鹽池後罷尉司分
猗氏安邑置縣以守之

又南過解縣東又西南注于張陽池

涑水又西逕猗氏縣故城北春秋文公七年晉敗
秦于令狐至于剗首先蔑奔秦士會從之闕駟曰

令狐卽猗氏也剗首在西三十里縣南對澤卽猗

頓之故居也孔叢曰猗頓魯之窮士也耕則常饑

桑則常寒聞朱公富往而問術焉朱公告之曰子

欲速富當畜五特於是乃適西河大畜牛羊于猗

氏之南十年之間其息不可計貲擬王公馳名天

下以興富於猗氏故曰猗頓也涑水又西逕郇城

詩云郇伯勞之蓋其故國也杜元凱春秋釋地云

今解縣西北有郇城服虔曰郇國在解縣東郇瑕

氏之墟也余按竹書紀年云晉惠公十有五年秦

穆公率師送公子重耳圍令狐桑泉白衰皆降焉

秦師狐毛與先軫禦秦至于廬柳乃謂秦穆公使公子繫來與師言退舍次于郇盟于軍京相璠曰春秋土地名桑泉曰衰並在解東南不言解明不至解可知春秋之文與竹書不殊今解故城東北二十四里有故城在猗氏故城西北鄉俗名之爲郇城考服虔之說又與俗符賢於杜氏單文孤證矣涑水又西南逕解縣故城南春秋晉惠公因秦返國許秦以河外王城內及解梁卽斯城也涑川又西南逕瑕城晉大夫詹嘉之故邑也春秋僖公二十二年秦晉圍鄭鄭伯使燭之武謂秦公曰晉許

君焦瑕朝濟而夕設版者也京相璠曰今河東解縣西南五里有故瑕城涑川又西南逕張陽城東竹書紀年齊師逐鄭太子齒奔城張陽南鄭者也漢書之所謂東張矣高祖二年曹叅假左丞相別與韓信東攻魏將孫林欽軍東張大破之蘇林曰屬河東卽斯城也涑水又西南屬于陂陂分爲二城南面兩陂左右澤渚東陂世謂之晉興澤東西二十五里南北八里南對鹽道山其西則石壁千尋東則礧谿萬仞方嶺雲迴奇峯霞舉孤標秀出罩絡羣山之表翠栢蔭峯清泉灌頂郭景純云世所

謂鴛漿也發于上而潛于下矣厥頂方平有良藥
神農本草曰地有固活女疎銅芸紫苑之族也是
以緇服思玄之士鹿裘念一之夫代往遊焉路出
北巘勢多懸絕來去者咸援蘿騰崖尋葛降溪於
東則連木乃陟百梯方降巖側縻鎖之跡仍今存
焉故亦曰百梯山也水泉山北流五里而伏云潛
通澤渚所未詳也西陂卽張澤也西北去蒲坂一
十五里東西二十里南北四五里冬夏積水亦時
有盈耗也

文水出大陵縣西山文谷東到其縣屈南到平陶縣

東北東入于汾

文水逕大陵縣故城西而南流有沁水注之縣西
南山下武氏穿井給養井至幽溪後一朝水溢平
流東南注文水又南逕平陶縣之故城東西逕其
城內南流出郭王莽更曰多穰也文水又南逕縣
右會隱泉口水謁泉山之上頂俗云暘雨愆時是
謁是禱故山得其名非所詳也其山石岸地嶮壁
立天固崖平有一石室去地可五十餘丈爰有層
松飾巖列栢綺望唯西側一處得歷級升陟頂上
平地一十許頃沙門釋僧光表建二刹泉發於兩

寺之間東流瀝石汭注山下又東津渠隱沒而不
恒流故有隱泉之名矣兩澤豐澍則通入文水又
南逕茲氏縣故城東爲文湖東西一十五里南北
三十里世謂之西河在縣直東一十里湖之西側
臨湖又有一城謂之猪城水澤所聚謂之都亦曰
猪蓋卽水以名城也文湖又東逕中陽縣故城東
案晉書地道記太康地記西河中有陽縣舊縣也
文水又東南流與勝水合水出西狐岐之山東逕
六壁城南魏朝舊置六壁於其下防離石諸胡因
爲大鎮太和中罷鎮仍置西河郡焉勝水又東合
水又東南入于汾水也

陽泉水出西山陽谿東逕六壁城北又東南流注
于勝水勝水又東逕中陽故城南又東合文水文
水又東南入于汾水也

原公水出茲氏縣西羊頭山東過其縣北

縣故秦置也漢高帝更封沂陽侯嬰爲侯國王莽
之茲同也魏黃初二年西河恭王司馬子盛廟碑
文云西河舊處山林漢末擾攘百姓失所魏興更
開疆宇分割太原四縣以爲邦邑其郡帶山側塞
矣王以咸寧四年改命爵土其年十二月喪國臣
太農閻崇離石令宗羣等二百三十四人刊石立

碑以述勲德碑北廟基尚存也

又東入于汾

水注文湖不至汾也

洞渦水出沾縣北山

其水西流與南谿水合水出南山西北流注洞渦水又西北黑水西出山三合源舍同歸一川東流南屈受陽縣故城東按晉太康地記樂平郡有受陽縣盧諶征艱賦所謂歷受陽而總轡者也其水西南入洞渦水又西蒲水南出蒲谷北流注之于洞渦又西與原過水合逕北便水流也水西阜上

有原過祠蓋懷道協靈受書天使憂結宿情傳芳後日棟宇雖淪攢木猶茂故層巖水取名焉其水南流注于洞渦水也

西過榆次縣南又西到晉陽縣南

榆次縣故塗水鄉晉大夫智徐吾之邑也春秋昭公八年晉侯築虎祁之宮有石言晉之魏榆服虔曰魏晉也榆州里名也漢書曰榆次十三州志以爲塗陽縣矣王莽之太原亭也縣南側水有鑿臺韓魏殺智伯瑤於其下剝腹絕腸折頭揩頤處也其水又西南流逕武觀城西北盧諶征艱賦曰逕

武館之故郭問厥墮之遠近洞渦水又西南爲淳湖謂之洞渦津澤而涂水注之水出陽邑東北大嶸山涂谷西南逕蘿磬亭南與蔣谷水合水出縣東南蔣谿魏土地記曰晉陽城東南一百一十里至山有蔣谷大道度軒車嶺通于武鄉水自蔣谿西北流西逕箕城北春秋僖公三十三年晉人敗狄于箕杜預釋地曰城在陽邑南水北卽陽邑縣故城也竹書紀年曰梁惠成王九年與邯戰榆次陽邑者也王莽之繁穰矣蔣谿又西合涂水亂流西北入洞渦澤也

西入于汾出晉水下口者也

劉琨之爲并州也劉淵引兵邀擊之合戰於洞渦卽是水也

晉水出晉陽縣西縣壅山

縣故唐國也春秋左傳稱唐叔未生其母邑姜夢帝謂已曰余名而子曰虞將與之唐屬之叅及生名之曰虞呂氏春秋曰叔虞與成王居王援桐葉爲珪以授之曰吾以此封汝虞以告周公周公請曰天子封虞乎王曰余戲耳公曰天子無戲言時唐滅乃封之於唐縣有晉水後改名爲晉故子夏

敘詩稱此晉也而謂之唐儉而用禮有堯之遺風也晉書地道記及十三州志並言晉水出龍山一水結紉山在縣西北非也山海經曰縣壅之山晉水出焉今在縣之西南昔智伯之遏晉以水灌晉陽其川上源後人踵其遺蹟蓄以爲沼沼西際山枕水有唐叔虞祠水側有涼堂結飛梁於水上左右雜樹交蔭希見曦景至有淫朋密友羈遊宦子莫不尋梁契集用相娛慰於晉川之中最爲勝處又東過其縣南又東入于汾水

汾水分爲二流北瀆卽智氏故渠也昔在戰國襄子保晉陽智氏防山以水之城不沒者三版與韓魏望歎於此故智氏用亡其瀆乘高東北注入晉陽城以周圍漑漢末赤眉之難郡掾劉茂真太守孫福之於城門西下空穴中其夜奔孟卽是處也東南出城流注于汾水也其南瀆於石塘之下伏流逕舊谿東南出逕晉陽城南城在晉水之陽曰晉陽矣經書晉荀吳帥師敗狄於大鹵杜預曰大鹵晉陽縣也爲晉之舊都春秋定公十三年趙鞅以晉陽叛後乃爲趙矣其水又東南流入于汾

湛水出河內軹縣西北山

水經 卷之六
三十一
湛水出枳縣南源湛谿俗謂之湛水也是蓋聲盡
鄰故字讀俱變同于三豕之誤耳其水自谿之南
流

東過其縣北又東過皮縣之北

湛水南逕向城東而南注

又東過毋辟邑南

源經所注斯乃汨川之所由非湛水之間關也是
經之誤證耳湛水自向城東南逕湛城東時人謂
之湛城亦或謂之隰城矣谿曰隰澗隰城在東言
此非矣後漢郡國志曰河陽縣有湛城是也

又東南當平陰縣之東北南入于河

湛水又東南逕鄧南流注于河故河濟有鄧津之
名矣

水經第六

水經第七

濟水一

濟水出河東垣縣東王屋山為沅水

山海經曰聯水出焉西北流注于秦澤郭景純云
聯沅聲相近即沅水也潛行地下至共山南復出
于東丘今原城東北有東丘城孔安國曰泉源為
沅流去為濟春秋說題辭曰濟齊也齊度也負也

漢 桑 欽撰

後魏 酈道元注

明 吳 瑄校

風俗通曰濟出常山房子縣贊皇山廟在東郡臨
邑縣濟齊其度量也余按二濟同名也所出不同
鄉源亦別斯乃應氏之非矣今濟水重源出溫城西
北平地水有二源東源出原城城東北昔晉文公
伐原以信而原降卽此城也俗以濟水重源所發
因復謂之濟源城其水南逕其城東故縣之原鄉
杜預曰沅水縣西北有原城者是南流與西源
合而源出原城西東沅水注之水出西南東北流
注于濟濟水又東逕原城南東合北水亂流東南
注分爲二水一水東南流俗謂之爲沅水卽沅水

也沅沅聲相近傳呼失實也濟水又東南逕郟城
北而出於溫矣其一水枝津南流注于澳澳水出原
城西北原山勳掌谷俗謂之爲白澗水南逕原城
西春秋會于澳梁謂是水之墳梁也爾雅曰梁莫
大於澳梁梁水堤也澳水又東南逕陽城東與南
源合水出陽城南溪陽亦樊也一曰陽樊樊國語曰
王以陽樊賜晉陽人不服文公圍之倉葛曰陽有夏
商之嗣典樊仲之官守焉君而殘之無乃不可乎
公乃出陽人春秋樊氏叛惡王使虢公伐樊執仲
皮歸于京師卽此城也其水東北流與漫流水合

水出軹關南東北流又北注于漫謂之漫流口渙
水又東合北水亂流東南左會濟水枝渠渙水又
東逕鍾繇塢北世謂之鍾公壘又東南塗溝水注
之水出軹縣西南山下北流東轉入軹縣故城中
又屈而北流出軹郭漢文帝元年封薄昭爲侯國
也又東北流注于渙渙水又東北逕波縣故城北
漢高帝封公上不害爲侯國渙水又東南流天漿
水澗水注之水出軹南畢向城北在鞏上俗謂之
韓王城非也京相璠曰或云今河內軹西有地名
向今無杜元凱春秋釋地亦言是矣蓋相襲之向

故不得以地名而無城也闕駟十三州志曰軹縣
南山西曲有故向城卽周向國也傳曰向姜不安
于莒而歸者矣汲郡竹書紀年曰鄭侯使韓辰歸
晉陽向二月城陽向更名陽爲河雍向爲高平卽
是城也其水有二原俱導各出一溪東北流合爲
一川名曰天漿溪又東北逕一故城俗謂之治城
亦曰治水又東流注于渙渙水又東南流右會同
水水出南源下東北流逕白騎塢南塢在原上爲
二谿之會北帶溪隍三面岨嶮唯西被築而已東
北流逕安國城西又東北注渙水渙水東南逕安

國城東又南逕無辟邑西世謂之無北城亦曰馬
髀城皆非也朝廷以居廢太子謂之河陽庶人也
渙水又南注於河也

又東至溫縣西北爲濟水又東過其縣北

濟水於溫城西北與故瀆分南逕溫縣故城西周
畿內國司寇蘇忿生之邑也春秋僖公十年秋滅
溫溫子奔衛周襄王以賜晉文公濟水南歷虢公
臺西皇覽曰溫城南有虢公臺基趾尚存濟水南
流注于河郭緣生述征記曰濟河內溫縣注于河
蓋公歷之實證非爲謬說也濟水故瀆於溫城西

北東南出逕溫城北又東逕虢公冢北皇覽曰虢
公冢堆在溫縣郭東濟水南大冢是也濟水當王莽
之世川瀆枯竭其後水流逕通津渠勢改尋梁脉
水不與昔同

屈從縣東南流過墳城西又南當鞏縣北南入于河
濟水故瀆東南合奉溝水水上承朱溝於野王城
西東南逕陽鄉城北又東南流逕陽鄉城北又東
南逕李城西秦攻趙邯鄲且降傅舍吏子李同說
平原君勝分家財饗士得敢死者三千人李同與
赴秦軍秦軍退李同歿封其父爲李侯故徐廣曰

河內平臯縣有李城卽此城也於城西南爲陂水
淹地百許頃蕪葭萑葦生焉號曰李陂又逕墳城
西屈而東北流逕其城北又東逕平臯城南應劭
曰邢侯自襄國徙此當齊桓公時衛人伐邢邢遷
于夷儀其地屬晉號曰邢丘以其在河之臯處勢
平夷故曰平臯瓚注漢書云春秋狄人伐邢邢遷
夷儀不至此今襄國西有夷儀城去襄國一百餘
里邢是丘名非國也余案春秋宣公六年赤狄
伐晉圍邢丘晉侯送女於楚送之邢丘卽是此
處也非無城之言竹書紀年曰梁惠成王三年鄭

城邢丘司馬彪後漢郡國志云縣有邢丘故邢國
周公子所封矣漢高帝六年封碭郡長項伯爲侯
國賜姓劉氏武帝以爲縣其水又南注于河也
與河合流又東過成臯縣北又東過滎陽縣北又東
至北礫磧南東出過滎陽北

釋名曰濟濟也源出河北濟河而南也晉地道志
曰濟自大伾入河與河水鬪南泆爲滎澤尚書曰
滎波旣豬孔安國曰滎波水以成豬鬪駟曰滎波
滎澤名也故呂忱云滎水在滎陽也謂是水也昔
大禹塞其淫水而於滎陽下引河東南以通淮泗

濟水分河東南流漢明帝之世司空伏恭薦樂浪人王景字仲通好學多藝善能治水顯宗詔與謁者王昊始作浚儀渠昊用景法水乃不害此卽景作所修故瀆也渠流東注浚儀故復謂之浚儀渠也明帝永平十五年東巡至無鹽據帝嘉景功拜河隄謁者漢靈帝建寧四年於敖城西北壘石爲門以遏渠口謂之石門故世亦謂之石門水門廣十餘丈西去河三里石銘云建寧四年十一月黃場石也而主吏姓名磨滅不可復識魏太和中又更修之撤故增新石字淪落無復在者水北有石門

亭戴延之所云新築城周城三百步滎陽太守所鎮者也水南帶三山卽皇室山亦謂之爲三室山也

濟水又東逕西廣武城北

郡國志滎陽縣有廣武城城在山上漢所城也高祖與項羽臨絕澗對語責羽十罪羽射漢祖中脅處也山下有水北流入濟世謂之柳泉也

濟水又東逕東廣武城北

楚項城之漢破曹咎羽還廣武爲高祖置太公壇其上曰漢不下吾烹之高祖不聽將害之項伯曰爲

天下者不顧家但益怨耳羽從之今名其壇曰項
羽堆亦城之間有絕澗斷山謂之廣武澗項羽叱
婁煩於其上婁煩精魄喪歸矣

濟水又東逕敖山北

詩所謂薄狩于敖者也其山上有城卽殷帝仲丁
之所遷也皇甫謐帝王世紀曰仲丁自亳徙囂于
河上者也或曰敖矣秦置倉於其中故亦曰敖倉
城也

濟水又東合滎瀆

瀆水受河水有石門謂之爲滎口石門也而地形

殊卑蓋故滎播所道自此始也門南際河有故碑
云惟陽嘉三年二月丁丑使河隄謁者王誨疏達
河川述荒庶土云大河衝塞侵齧金隄以竹籠石
葺葦土而爲遏壞隄無已功消億萬請以瀆河郡
徒疏山采石壘以爲鄣功業旣就徭役用息未詳
詔書許誨立功府鄉規基經始詔滎加命遷在沈
州乃簡朱軒授使司馬登令續茂前緒稱遂休功
登以伊洛合注大河南則緣山東過大伾回流北
岸其勢鬱濛濤怒湍急激疾一有決溢彌原淹野
蟻孔之變害起不測蓋自姬氏之所常感昔崇鮫

所不能治我二宗之所劬勞於是乃跋涉躬親經
之營之比率百姓議之于臣伐石三谷水匠致治
立激岸側以捍鴻波隨時慶賜說以勸之川無滯
越水土通演役未踰年而功程有畢斯乃元勳之
嘉課上德之弘表也昔禹修九道書錄其功后稷
躬稼詩列于雅夫不憚勞謙之勤夙興厥職充國
惠民亦得湮沒而不章焉故遂刊石記功垂示于
後其辭云云使河堤謁者山陽東昏司馬登字伯
志代東萊典城王誨字孟堅河內太守守城向豺
字伯尹丞汝南鄧方字德山懷令劉丞字季意河

堤掾匠等造陳留浚儀邊韶字孝先頌石銘歲遠
字多淪缺其所滅蓋闕如也滎瀆又東南流注于
浦今無水次東得宿須水口水受大河渠側有扈
城水自亭東南流注于濟水今無水宿須在河之
北不在此也蓋名同耳自西緣帶山隰秦漢以來
亦有通否濟水與河渾濤東注晉太和中栢溫北
伐將通之不果而還義熙十三年劉公西征又命
寧朔將軍劉遵考仍此渠而漕之始有激湍東注
而終山崩壅塞劉公於北十里更鑿故渠通之合
則南瀆通津川澗是導耳濟水於此又兼邲目春

秋宣公十三年晉楚之戰楚軍于邲卽是水也昔
卞京相璠曰在敖北

濟水又東逕滎陽縣北

曹太祖與徐榮戰不利曹洪授馬於此處也

濟水又東南礫石溪水注之

水出滎陽城西南李澤澤中有水卽古馮池也地
理志曰滎陽縣馮池在西南是也東北流歷敖山
南春秋晉楚之戰設伏于敖前謂是也逕號亭北
池水又東北逕滎陽縣北斷山東北注于濟世謂
之礫石澗卽經所謂礫溪矣經云濟出其南非也

濟水又東索水注之

水出京縣西南嵩渚山與東關分水卽古旃水也

其水東北流器難之水注之山海經曰小涇之山

器難之水出焉而北流注于侵卽此水也其水北

流逕金亭又北逕京縣故城西入于梅海然之水城

故鄭邑也莊公以居弟段號京城大叔升祭仲曰京

城過百雉國之害也城北有壇山單趙世家成侯

二十年魏獻滎陽因以爲壇臺單也其水亂流北

逕小索亭西京相璠曰京有小索亭世語以爲本

索氏兄弟居此故號小索者也又爲索水索水又

北逕大柵城東晉滎陽民張卓董邁等遭荒鳩聚
流離堡固名爲大柵塢至太平真君年潁州刺史
崔白自虎牢移州治此又東開廣舊城創制改築
焉太和十七年遷都洛邑省州置郡索水又屈而
西流與梧桐澗水合泉出西南梧桐谷東北流注于
索斯水亦時有通塞而不常流也索水又北屈東
逕大索城南春秋傳曰鄭子皮勞叔向於索水卽
此城也晉地道志所謂京有大索小索亭漢書京
索之間也索水又東逕號亭南應劭曰滎陽故號
之國也今號亭是也故馬淵郡國志曰縣有號亭俗

謂之平眺城城內有大冢名管叔冢或亦謂之爲
號眺城非也蓋號眺字相類字轉失實也風俗通
曰俗說高祖與項羽戰於京索遁於薄中羽追求
之時鳩止鳴其上追之者以爲必無人遂得脫及
卽位異此鳩故作鳩杖以扶老案廣志楚鳩一名
嚶啁號眺之名蓋因鳩以起目焉所未詳也索水
又東北流須水古入馬水近出京城東北二里榆
子溝亦曰柰榆溝也又亦或謂之爲小索水東北
流木蓼溝水注之水上承京城南淵世謂之車輪
淵淵水東北流謂之木蓼溝又東北入于須水須

水又東北流於滎陽城西南北注索索水又東逕
滎陽縣故城南漢王之困滎陽也紀信曰臣詐降
楚王宜間出信乃乘王車出東門稱漢降楚楚軍
稱萬歲震動天地王與數十騎出西門得免楚圍
羽見信大怒遂烹之信冢在城西北三里故蔡伯
喈述征賦曰過漢祖之所隘予紀信於滎陽其城
跨倚岡原居山之陽王莽立爲新隊備周六隊之
制魏正始三年歲在甲子被癸丑詔書割河南郡
鞏縣自闕以東創建滎陽郡并戶二萬五千以南
鄉築滎陽城鄉亭侯李勝字公照爲郡守顧原武典

農校尉政有遺惠民爲立祠於城北五里號曰李
君祠廟前有石蹠蹠上有石的石的銘具存其略
云百族欣戴咸推厥誠今猶祀禱焉索水又東逕
周苛冢北漢祖之出滎陽也令御史大夫周苛守
之項羽拔滎陽獲苛曰吾以公爲上將軍封三萬
戶侯能盡節乎苛瞋目罵羽羽怒烹之索水又東
流北屈西轉北逕滎陽城東而北流注濟水杜預
曰旃然水出滎陽成臯縣東入汴春秋襄公十八
年楚伐鄭石師涉潁次于旃然卽是水也濟渠水
斷汴溝唯承此始故云吸受旃然矣亦謂之鴻溝

水蓋因漢楚分王指水爲斷故也郡國志曰滎陽有鴻溝水是也蓋因城地而變名爲川流之異目濟水又東逕滎陽澤北故滎水所都也京相璠曰滎澤在滎陽縣東南與濟隧合濟隧上承河水於卷縣北河南逕卷縣故城東又南逕衡雍城西春秋左傳襄公十一年諸侯伐鄭西濟於濟隧杜預闕其地而名之水也京相璠曰鄭地也言濟水滎澤中北流至恒雍西與出河之濟會南去新鄭百里斯蓋滎播河濟往復逕通矣出河之濟卽陰溝之上源也濟隧絕焉故世亦或謂其故道爲十字

溝自于岑造入激堤於河陰水脉徑斷故瀆難尋又南會于滎澤然水旣斷民謂其處爲滎澤春秋衛侯及翟人戰於滎澤而屠懿公弘演報命納肝處也有垂隴城濟瀆出其北春秋文公三年晉士穀盟于垂隴者也京相璠曰垂隴鄭地今滎陽東二十里有故隴城卽此是也世謂之都尉城蓋滎陽典農都尉治故變垂隴之名矣澤際又有沙城城左佩濟瀆竹書紀年梁惠成王九年王會鄭釐侯于巫沙者瀆際有故城世謂水城非也史記秦昭王四十二年魏冉攻魏走芒卯入北宅卽故宅

陽城也竹書紀年曰惠王十三年王及鄭釐侯盟于巫沙以釋宅陽之圍歸釐于鄭者也竹書紀年晉出公六年濟鄭伐衛荀瑤城宅陽俗言水城非矣濟水自澤東出卽是始矣王隱曰河決爲滎濟水受焉故有濟堤矣爲北濟也濟水又東南逕釐城東春秋經書公會鄭伯于時來左傳所謂釐也京相璠曰今滎陽縣東四十里有故釐城也濟水又合黃水黃水發源京縣黃淮止東南流名祝龍泉泉勢沸湧狀若巨鼎湯湯西南流謂之龍項口世謂之京水也又屈而北注魚子溝水入焉水出石

暗澗東北流又北與漑漑水合水出西谿東流水上有連理樹其柞櫟也南北對生凌空交合谿水歷二樹之間東注注于魚水魚水又屈而西北注黃水黃水又北逕高陽亭東又北至故市縣重泉水注之水出京城西南小陸山東北流又北流逕高陽亭西東北流注于黃水又東北逕故市縣故城南谿高帝六年封閭澤毋赤爲侯國屬縣也黃水又東北至滎澤南分爲二水一水北入滎澤下爲船塘俗謂之邾城陂東西四十里南北二十里竹書穆天子傳曰甲辰天子浮于滎水乃奏廣樂

是也一水東北流卽黃雀溝矣穆天子傳曰壬寅天子東至于雀梁者也又東北與靖水枝津合二水之會爲黃泉北流注于濟水

又東過陽武縣北

濟水又東南流入陽武縣歷長城東南流蒗蕩渠出焉

濟水又東北流南濟也逕陽武縣故城南

王莽更名之曰陽桓矣又東爲白馬淵淵東二里南北一百五十步泉流名爲白溝又東逕房城北穆天子傳曰天子里圃田之路東至于房疑卽斯

城也郭注云以爲趙郡房子也余謂穆王里鄭圃而郭以趙之房邑爲疆更爲非矣

濟水又東逕封丘縣南

又東逕大梁城北東左逕倉垣城又東逕小黃縣之故城北縣有黃亭說濟又謂之曰黃溝縣故陽武之東黃鄉也故水以名縣沛公起兵野戰喪皇妣于黃鄉天下平定乃使使者梓宮招魂幽野於是丹旒日水濯洗入于梓宮其浴處有遺髮焉故謚曰昭靈夫人因作寢以寧神也

濟水又東逕東昏縣故城北

武陽縣之戶牖鄉矣漢丞相陳平家焉平少爲社
宰以善均肉稱今民祠其社平有功於高祖封戶
牖侯是後置東昏縣也王莽改曰東明矣

濟水又東逕濟陽縣故城南

故武父城也城在濟水之陽故以爲名王莽改之
曰濟前者也光武生濟陽宮光明照室卽其處也
東觀漢記曰光武以建平元年生於濟陽縣是歲
有嘉禾生一莖九穗大於凡禾縣界大熟因名曰
秀

又東過封丘縣北北濟也

自滎澤東逕滎陽卷縣之武修亭南春秋左傳成
公十五年鄭子然盟于修澤者也鄭地矣杜預曰
卷東有武修亭

濟水又東逕原武縣故城南

春秋之原圃也穆天子傳曰祭父自圃鄭來謁天
子夏庚午天子飲于洧上乃遣祭父如圃鄭是也
王莽之原圃矣濟瀆又東逕陽武縣故城北又東
絕長城築也案竹書紀年梁惠成王十二年龍賈
率師築長城于西邊自亥谷以南鄭所城矣竹書
云是梁惠王十五年築也郡國志曰長城自卷逕

陽武到密者是矣

濟瀆又東逕酸棗縣之烏巢澤北

澤有故亭晉太康地記曰澤棗之東南昔曹太祖納許攸之策破袁紹軍處也濟瀆又東逕封丘縣南燕縣之延鄉也其在春秋爲長丘焉應劭曰左傳宋敗狄于長丘獲長狄緣斯是也漢高帝封翟盱濮水出焉濟瀆又東逕大梁城之赤亭北而東

注

又東過平丘縣南北濟也

縣故衛地也春秋魯昭公十三年諸侯盟于平丘

是也縣有臨濟亭田儋外處也又有曲濟亭皆臨側

濟水者又東過濟陽縣北濟也

自武父城北圜稱曰闕駟曰在縣西北鄭邑也東逕濟陽縣故城北陳留風俗傳曰縣故宋地也竹書紀年梁惠成王三十年城濟陽漢景帝中元六年封梁孝王子明爲濟川王應劭曰濟川今陳留濟陽縣是也

又東過寃昫縣南又東過定陶縣南南濟也

濟瀆自濟陽縣故城南東逕戎城北春秋隱公二

年公會戎于潛杜預曰陳留濟陽縣東南有戎城是也

濟水又東北荷水東出焉

濟水又東北逕宛眇縣故城南呂后元年封楚元王子劉執爲侯國王莽之濟平亭也

濟水又東逕秦相魏冉冢

冉秦宣太后弟也代客卿壽燭爲相封於穰益封于陶號曰穰侯富於王室范睢說秦秦王悟其擅權免相就封出關輜車千乘卒于陶而因葬焉世謂之安平陵墓南崩碑尚存

濟水又東北逕定陶恭王陵南

漢哀帝父也帝卽位母丁太后建平二年崩上曰宜起陵于恭皇之園送葬定陶貴震山東王莽秉政貶號丁姬開其柩戶火出炎四五丈吏卒以水沃滅乃得入燒燔櫛中器物公卿遣子弟及諸生四夷十餘萬人操持作具助將作掘平共王母傅太后墳及丁姬冢二旬皆平莽又周棘其處以爲世戒云時有羣鷺數千銜土投于丁姬窀中今其墳冢巍然尚秀隅阿相承列郭數周面開重門南門內夾道有崩碑二所世尚謂之丁昭儀墓又謂

之長隧陵蓋所毀者傳太后陵耳丁姬墳墓事與書違不甚過毀未必一如史說也瀆南魏郡治也世謂之左城亦名之曰葬城蓋恭王之陵寢也

濟水又東北逕定陶縣故城南

側城東注也縣故三醜國也湯追桀伐三醜卽此周武王封弟叔振鐸之邑也故曹國漢宣帝甘露二年更濟陰爲定陶國王莽之濟平也戰國之世范蠡旣雪會稽之耻乃變姓名寓之於陶爲朱公以陶天下之中諸侯四通貨物之所交易也治產致千金富好行德子孫修業遂致巨萬故言富者

皆曰陶朱公也

又屈從縣東北流南濟也

又東北右合河水水瀆上承濟水於濟陽縣東世謂之五丈溝又東逕陶丘北地理志曰禹貢定陶西南有陶丘陶丘亭在南墨子以爲釜丘也竹書紀年魏襄王十九年薛侯來會王于釜丘者也尚書所謂導河水自陶丘北謂此也河水東北出於定陶縣北屈左合汜水汜水西分濟瀆東北逕濟陰郡南爾雅曰濟別爲澹呂忱曰水決復入爲汜廣異名也汜水又東合于河瀆昔漢祖旣定天下

水經第七
卷之七
卽帝位於定陶汜水之陽張晏曰汜水在濟陰界
取其汜愛弘大而潤下也汜水名於是乎在矣汜
水又東北逕定陶縣南又東北右合黃水枝渠渠
上承黃溝東北合河而北注濟瀆也

水經第七

